

灼

艾

集

灼艾別集卷之二

四明萬表選集

男達甫訂証

孫邦孚重梓

雙溪雜記

封祿

國初天下諸王皆置護衛有兵權至太宗靖難後遂皆革罷不許來朝初制親王歲支祿米一萬石後因地方豐歉或有減支郡王將軍俱有常祿亦因民供有限悉減支一半本色一半折色其折色多不關支又如初封郡王歲支二千石以後襲封俱支一千石後亦有例初封郡王亦支一千石又如郡王生子

多至二三十人者有之慶成王生七十子夫以十子  
論之一歲該支米一萬五千石反多於一字王祿米  
矣先年陝西慶府分封郡王俱於慶府一萬米內分  
撥并軍校亦於大府分出不知彼時奉何事例又如  
鎮國等將軍年十一二歲即請封號祿米弘治十一  
年因災異禮部會官議修省事件即中慈谿王綸白  
於諸大臣定議鎮國等將軍年及十五歲方准撥支  
祿米至今行之以民供論之則日益不給以宗室論  
之徃徃衣食不繼反不如庶民之家得自為生計也  
又宗室犯罪降為庶人者計口月給米石比與將軍

官俸

中尉反得實惠宗室例不得種田納稅商販營利而常祿不給日見其貧乏不能存活矣

國初定制百官俸給皆支本色米石如知縣月支米七石歲支米八十四石足勾養廉用度後改四品以上三分本色七分析色五品以下四分本色六分析色後又改在外官月支本色米二石其餘俱支折色其折色以鈔為則每米一石折鈔十五貫或二十貫每布一疋折米二石京官折俸四五年不得一支外官通不得支俸祿之制果能守執欲禁貪婪是以難也

陞轉

別以另集卷之二

國初官制全論歷俸深淺轉陞如京官六品六年考滿陞一級後五品又歷俸三年陞一級正五品外官必九年考滿論繁簡陞轉此定制也如宋景濂洪武二年除學士十年致仕五品終身自洪熙以後其法漸變蓋因四品以上官漸少五品以下官漸多卑官該陞高官無缺不得陞或卑官未該陞高官急缺亦須陞補以此有不待缺而陞者如翰林院學士春坊殿閣大學士有陞至尚書侍郎帶虛銜者通政使太常卿國子監祭酒及由序班出身陞至鴻臚寺卿醫士出身陞至太醫院使寫字出身在內閣書辦陞至

編脩郎中等官皆有陞至尚書侍郎特虛銜者皆因該陞而無缺也又有急缺而無該陞之人則與署職如六部署郎中員外郎是也然署職之例惟行於六部司屬其餘衙門無之如給事中之上監察御史之上序班行人中書之上俱無五品官員以此俱無署職國初有御史陞主事者如僉都御史陞侍郎也然翰林科道官職專講讀彈劾近侍清要又因在外四品以上官缺多乃於科道部屬中各論其歷俸年深者不次陞補翰林官不歷政事故不外補九年方得陞行人內選補科道中書亦九年得陞各部員外郎

惟序班一官九年方得外陞八品官最為貧苦此建  
官之制變而不能久也蓋轉遷雖有資序官制則有  
定員若資序雖當遷轉而官無員缺則但仍舊任不  
遷中間年深政績卓異者加陞俸級必待有缺方遷  
補之則黜陟之典額定之員兩不相悖矣國初定黜  
陟之法即古三載考績黜陟幽明之意今百官歷俸  
三年六年九年考滿三次方論黜陟是也然官或有  
缺不候滿考而陞去者多矣是三考陟官之法不守  
也又三年一朝覲考察不候滿考而黜去者多矣是  
三考黜官之法不守也既行三載考察之法又行遇

古罷丞相分任六卿無偏聽獨任之弊此法能世守之朝政悉付六卿如有違枉臺諫得糾正論劾朝廷端拱以照臨於上萬世無弊矣

嘗見紀國初事績者內載洪武間設有殿閣大學士其職不過代草詞令然每有犯輒罪黜凡制誥碑文祭文多出御製如今天下各衙門表箋祝文祭文雖臣下所用亦出御製至於武臣誥命皆組織之不書其人每日群臣奏事面奏取旨畢各衙門官將奉旨意批寫本後送該科類寫奉到旨意覆奏豈有大學士學士敢自為口旨送內批於本面發出之事乎



內閣

永樂初始建內閣於東角門內命解縉黃淮胡廣胡  
儼楊榮金幼孜楊士奇七人在閣辦事尋陞侍講  
仁宗皇帝正位東宮皆轉春坊官九章制纂修等事  
惟翰林院掌之無內閣掌管之說也如永樂十三年  
纂修性理大全書成翰林院學士兼春坊大學士奉  
政大夫胡廣奉政大夫右春坊右庶子兼翰林院侍  
講楊榮奉直大夫右春坊右諭德兼翰林院侍講金  
幼孜上進表呈蓋雖春坊官必須兼翰林院職銜方  
得預纂修之事未有殿閣大學士而獨任纂修之事  
者也况永樂間胡廣所兼不過左春坊大學士則是

時殿閣大學士不設已久矣今雖尚書在內閣辦事六部請勅手本只云合用手本前去翰林院寫勅施行則舊意猶存可攷也終永樂之世二楊官止五品蓋為衙門所拘初未有衙門小官大之例也

仁宗登極始以東宮舊臣陞士奇為禮部侍郎尋陞少保轉少傅兼華蓋殿大學士楊榮為太常卿進太子少傅兼謹身殿大學士又陞工部尚書在閣辦事楊溥永樂間繫獄十年至是釋出擢翰林院學士尋陞太常卿兼學士內閣辦事此三人皆以龍飛超陞委任不可以例論也後楊溥丁憂起復不入閣宣德

間因九年三品職滿方陞禮部尚書學士如故。

英宗即位復命入內閣。正統四年修宣廟實錄成。進少保楊士奇、楊榮俱進少師。號三楊。初楊榮陞尚書。不過工部。則不敢以兼官壓六卿之意。可見然自官制一變。其後遂使雜流出身在內閣書辦年久者。亦得陞至尚書。至於序班道士。亦以年資陞至尚書。掌鴻臚寺太常寺事。皆三楊開其端也。由是內閣之權漸重。無異宰相之設。六部之權漸輕。凡事多稟受內閣風旨而後行。卒使祖宗官制額定之員。所以增置而日久因襲。遂不可復改矣。

醜不死也

太宗文皇帝靖難之初翰林近侍官周是修自縊於  
應天府學胡廣金幼孜解縉楊士奇等皆不死是時  
欲下詔姚廣孝舉方孝孺代草不迭死之胡廣等後  
居內閣文廟雖令講讀纂脩商議政事然文廟  
英明獨斷無敢以私意進言者如解縉諫征交趾言  
雖公竟不迭議過寵漢府致有異志遂以為離間骨  
肉殺之以此知永樂間內殿閣官自保不暇况敢專  
權自恣乎

○  
宣廟在位十年三楊雖被寵用然承洪武永樂以來  
主威權強盛之後宣廟又以明睿臨之亦不敢任

情專制 仁廟初崩議喪禮部尚書呂震奏定儀注  
已頒行楊士奇等言於上欲改之震面折之曰凡事  
皆被汝等偏執壞了至次日早朝群臣冠服皆依禮  
部所定惟士奇等與英國公依內閣所議行 宣廟  
退朝語楊士奇等曰英國公雖武臣到能守禮蓋慰  
藉之詞耳然自後楊榮等漸專朝政人有犯法求救  
或在卑求薦皆留意成之五府六部或畏其威聽其  
說遂使百職不能持正思天下之士不由己進退勅  
方面風憲郡守令在京三品以上官舉保又勅御史  
知縣令在京五品以上官舉保奔競之風大行以賊

露者甚衆由其操去取之權故耳如楊士奇薦主事洪興為侍講與經筵又薦為吏部侍郎人莫能抗以上事皆載於大學士李賢所著天順日錄可見內閣官專權始於宣德而成於正統初也

英宗九歲登極有詔凡事白於張太后然後行太后令付內閣議決每數日必遣中官入閣問連日曾有何事來商確具帖開報驗有不付閣議者即召司禮監責之內閣票旨始此

太宗文皇帝建都北京凡百政務多出權耳因北征土木川賓天未及更正宣宗在位十年天下承平

因三楊俱南人陰有都南之意亦未議改如北京六部仍稱行在正統間始去行在二字文武官俸仍於南京倉閩支戶部茶鹽引油銅板言者欲取貯行在戶部竟不從留馮快船於通州聽用至今行之蓋自兩京並建兵冗費繁而永樂一時用兵權宜之政遂因襲而為弊也

自古女后專政甚至臨朝稱制以致禍亂惟我太祖高皇帝家法嚴正后妃不許傳旨於外亦不許群臣朝見卅守為法正統初雖有詔凡事白張大后而後行太后命司禮監以章奏送內閣擬旨送

上仍以聖旨行之未有徑以太后懿旨施行者其  
內閣官擬旨最為機密未敢顯言於外旨由我出也  
英宗春秋漸長太后崩廢決大政悉由宸斷司禮  
監太監王振乘間進言決意北征土木之變後英  
宗復辟司禮監太監吉祥反逆伏誅初徐有貞以迎  
駕為吉祥后亨等引徐有貞又引李賢同入內閣有  
貞等欲避形迹密計除亨等吉祥不自安遂反亨等  
未敗時先奏有貞等諷言官論已英宗怒下有貞  
等獄旋赦之外補叅政先是有貞顯然專政賢但默  
助之亨等不知以為諷言官論已非賢意仍留賢轉



吏部左侍郎復入閣辦事及吉祥石亨被誅而賢任益專矣

國初制律風憲官挾私彈事罪如誣告人加等反坐洪武永樂宣德間未有敢挾私彈劾人者正統初頒行憲綱亦禁挾私言事又禁彈劾大臣生殺予奪出自朝廷不許再劾是以當時有直言敢諫之臣而無舉親劾讐之事如解縉之於永樂戈謙之於宣德劉球之於正統有忠直而無奸私至於聽大臣指使作鷹犬搏擊人如晚宋之風者則蔑聞焉又如朝廷已知臣下奸惡亦必令言官彈劾而後加罪者尤未聞

也始自徐有貞等乘英宗復辟之初欲害于謙等始假六科十三道都給事中王鎮等之奏以為獄案後英宗欲罪徐有貞等遂倣前例亦召言官劾奏而後下之獄此端一開遂不可改而鷹犬之輩從此出矣自古忠臣當國勲望大著必有一般奸邪之人在旁忌嫉讐怨乘機報復而為忠臣者不能逆料也如武三思之殺張柬之丁謂之竄寇準豈以張柬之寇準不能明哲保身哉其始惟知正誼謀道不能逆覩成敗利鈍耳正統己巳之秋兵部尚書于謙以社稷為重力排和議身任總督軍務選將練兵坐摧強

虜光輔中興厥功非細及虜酋也先遣使來言欲差  
大臣往迎上皇都御史楊善使虜不持一繒以口  
舌曉譬國威不屈遂得回轡當時天下之人皆知譙  
以身佩安危功在社稷而謙亦自信其得効忠蓋揚  
眉吐氣於班行而豈自虞其有殺身亡家之禍於後  
日哉柰何于公效用之日正小人側目之秋故事幾  
一變挾之以忌嫉之私而乘之以衆怒之隙于公於  
是乎難免矣蓋上皇回鑒景泰旣不讓位而居於  
南城又廢皇儲而立己子景泰之所以得罪於  
上皇者不小而景泰忽病危儲嗣亦先殞譙乃見用

於景泰之人此第一可乘之隙也景泰無嗣舊臣失  
倚以迎 駕為各自可邀功希寵此可乘之隙二也  
非造謔言中傷譴等則奪門之事為無名迎駕之舉  
為無功此可乘之隙三也危疑之際兵權是賴故奸  
深者必欲假石亨而後事可濟然不怵之以大利害  
則亨或不從故駕其說于石亨等曰王文于謙已遣  
金牌勅符取襄王世子矣又曰欲拿亨等數人掌兵  
者由是亨惧禍及而與吉祥徐有貞輩內外相應密  
謀固結而譴等駢首就戮矣

洪武永樂間文武大臣未有師保之加如魏國公徐

師保

遼誠意伯劉基皆無加秩至仁宗登極始加英國公張輔為太師楊士奇陞少保進少傅楊榮陞太子少傅進少保後三楊皆進少師楊士奇楊榮先卒皆贈太師楊溥正統十一年卒王振用事不與贈及蹇義夏元吉黃福等加師保皆在永樂之後也景泰間易太子文武大臣皆加保傅之官惟于謙加少保有安攘功無愧其餘皆濫加也天順初悉革保傅官天順五年曹欽反逐吳瑾寇深殺死李賢被傷獨加太子少保至憲宗登極始加少保吏部尚書王翱始加太子太保其後有以考滿加秩者或以功加者

纂修

至於無故加秩必先加武臣以塞口甚至以定策遍  
加戚畹武臣由內閣欲冒白爵有以啟之也  
洪武初學士宋濂總修元史永樂初高廟實錄皆  
亦學士等官纂修宣德初纂修文廟仁廟兩朝實  
錄亦翰林院掌行正統初修宣廟實錄楊士奇楊  
榮楊溥自以舊任翰林領其事四年書成楊士奇楊  
榮俱自加少師楊溥加少保其餘各陞級蓋以直內  
閣為典機務不異古宰相之任而又總裁國史侵學  
士之職變易舊制皆自三楊始也  
成化以後居內閣官者存心正大不招權納賄典六  
約策別集卷之二

部官相處自無矛盾六部事有違失內閣官密裁抑之六部自然畏服惟欲招權自專遂生讐隙尹旻由吏部侍郎陞尚書掌銓衡者十八九年選法公平士有定守萬安為內閣首深惡之每語所親厚者曰言官有能劾尹同仁者勿憂無大官做也然旻在吏部久公論已歸又壽光劉珣與旻同鄉相厚亦在內閣位亞于安能持正論安雖欲害旻為珣所梗不得行及珣因易儲事為安所讒間罷免安遂引尹直入閣託所私道士李孜省讒譖旻罪下旻子侍講龍於獄令旻致仕連及旻鄉里故舊皆降謫外補才望如侶

鍾張海輩亦在貶謫之數成化丁未孝宗登極李孜省下獄死尹直罷黜萬安臺諫交章論劾極其醜詆時劾吉亞安佐素附安因為之地寢不行廢吉士鄒智進士李文祥中書舍人吉人皆論之安自票旨令吏部選除李文祥繁難衙門做縣丞着歷練鄒智與安皆蜀人智言安貪佞固寵老無廉恥劉吉附下罔上漫無可否天下之小人也王恕彭韶天下之君子也尤忤內閣意鄒智李文祥吉人相繼卒人以比之王惲盧照隣云弘治改元司禮監太監懷恩先以直道黜居鳳陽至是召還司禮監預聞朝政恩素知



萬安謫安及知王恕巡撫蘇松時奏發中官王敬欺罔事跡及巡撫雲南時禁制鎮守太監錢某不得肆行奏于上去萬安用王恕早朝退恩偕內閣傳旨令安出自陳解其牙牌安趨出東長安門外逆者不知也即日降勅差人起取王恕為吏部尚書進賢退不肖一旦勇決如此人心為之痛快後萬安并子輩孫弘璧相繼死絕嗣

國朝進退大臣皆出宸斷天順間陞用大臣每朝畢宣吏部發玉音除某人為某部侍郎尚書成化間始有吏部會官推舉之例其權遂歸于內閣每遇缺

吏部先必謀於內閣而後定稍出已意必令再推或  
諷使兩私言官論劾故凡內閣官親舊同年相知厚  
者無不拔引超擢要地吏部與內閣相黨附者亦得  
固寵終身如尹旻王恕立心不阿必被其害也內閣  
引用親舊人以為公論無敢議者若出宸斷用一  
人雖至公亦必緘劾以為不由推舉夤緣而得律條  
明載大臣專擅選官者斬其弊由至於此勢使然耳  
劉吉致仕丘濬徐溥學而不能約持公而失於偏嘗  
言王恕雖好官但好名太甚弘治癸丑春朝覲考覈  
天下諸司吏部以黜陟聞濬擬旨皆全用所著大學

衍義補中語有曰人才難得事實得實人貴改過留  
用數人衆多咲之者溥論有所異同灑輒怒摔冠於  
案執愈堅未久卒

朱子說大學是為學的間架看大學章句好只須看  
經傳久之經傳也不用自有一部大學在胸中所謂  
博而能約正如此尚書云德無常師主善為師善無  
常主協於克一亦此意蓋正心修身須要格物窮理  
然非必一一而格之但真積力久一旦自然到箇豁  
然貫通處可以泛應曲當而無不浚宜矣真德秀乃  
以事類衍大學為一定之法其見已差至於丘濬補

衍益詳凡天下政事古今沿革無不備載其意此書一出可以尋類攷按處斷天下之事如刑名家引律條之意無一事不可折衷而用其中矣殊不知天下之事變無窮而理亦無窮大學教人欲明一心之德以應萬事非欲事事立法而不本於一心之活法也況有治人無治法氣數之不齊世道之升降而事有不能必盡善者哉

河南洛陽劉健自官翰林潛心理學不事華藻立心亦端正自徐溥去後專代言之任一以公平為主外無訾議李東陽同時在閣以詩文氣節援引名流私

植朋黨健處之若不知誠可謂君子人矣惟處程敏政事論者以健為報復私怨敏政與東陽齊名嘗見健所作詩謂人曰不知劉先生不會做詩人以為因是怨敏政及勦政為會試主考人有言其賣題者及揭曉同考給事中林廷玉上言敏政賣題雖未發露而可擬者七遂捕舉人徐姓及敏政下獄命多官廷鞠徐姓者雖未取中曾以二幣餽敏政受之坐是落職蓋敏政罪既在可疑及翰林官嘗為坐主受門生餽遺亦係常事而獨廷鞠敏政坐以賊罪所以不能不起人之議也

劉瑾

孝宗晚年勵精圖治召見大臣商確政事有大獄御  
午門面鞫總攬權綱下無壅蔽及大漸召劉健李東  
陽謝遷三人至乾清宮正寢面受顧命天下頌之

武宗嗣位之初舊東宮侍臣劉瑾馬永成谷大用魏  
彬丘聚羅祥張興等日夕近侍講論世事時稱為黨  
內劉瑾通文墨熟世務而性剽狠尤深惡文臣專權  
屢於上前言弘治間朝權俱為司禮監內閣所堂  
朝廷不過虛名而已如天下鎮守等項內官皆司禮  
監官舉用受大賄賂如不信只將司禮監掌印太監  
李榮抄下有金銀可滿三間房若將天下鎮守內官

進銀謝恩

文獻公集

卷之二

十一

取回別用一番人令他各備銀一二萬兩進上謝恩  
勝如司禮監要了於是傳旨盡數取回新用者論地  
方大小借貸銀兩進貢方得差出到彼肆意誅求無  
所忌憚甚至取於官庫莫敢不從初承運庫內官差  
往南京織造龍衣弘治年間例奏討長蘆運司官鹽  
載至南京變賣銀兩買辦織造物料業已行時韓文  
為戶部尚書司屬官李夢陽王崇文徐廷用等以名  
節尚言於文曰今新政之初決不可准鹽課織造於  
是再執奏上召內閣問之曰何為如此等劉健對  
以為內官裝載官鹽夾帶私鹽沿途害人上曰內

官固害人文官也有不好的李夢陽遂草一疏言自古關宦誤國漢中常侍唐甘露之變至今言之可為痛心英宗皇帝狎一王振致有土木之變乞將劉瑾等拿問付之俎醢戶部韓文為首率九卿共劾之司禮監太監王岳范亨徐智內應內閣劉健等亦助之時王岳等亦為上所信任密奏外朝多官劾奏瑾等不可不誅上不待已允之會天晚待明日奏旨捕瑾等下獄李東陽與劉瑾有舊瑾素敬東陽有詩文名至是東陽以韓文等所謀泄於瑾左右有以王岳密奏告瑾者瑾等遂趨至御在所俯伏哀號



訴岳等內外交通欲害我等。上以為無此事。璫等曰：「若待明日，臣等再不得見。」天顏大憤。今晚拏岳等三人送獄。方可。上不得已，領之璫等出。傳旨夜捕岳等繫獄。明日奏請令劉瑾入司禮監兼提督團營兵馬，設內行官校巡察兵衆，提督東廠官校巡察谷大用，提督西廠官校巡察張永等，并李榮、王岳、范亨、徐智俱發南京充軍。行至臨清，將王岳縊殺之。由是猶歸璫等勢傾中外。璫等先嘗奏內閣專主大事，納賄行私，及言文官欺壓內官軍職之事，至形於劇戲。上久信之。至是遂令劉瑾等三人自陳，准致仕。

誰欺乎

斗心敗露

內李東陽獨留不去東陽上言臣等三人責任一同而獨留臣將何辭以謝天下章屢上竟不從東陽門徒最盛初皆以為東陽素有文名故得不去及後劉瑾於朝陽門外創造玄真觀東陽為製碑文極其稱頌人始信泄捕瑾等之事為真遠有進納內府折銀者內有假偽驗出以韓文不能防奸罷職為民令邏卒伺察于途文乘一驟宿野店而歸邏卒無所得遠即中張偉公差回乘轎尚寶卿崔某冊封畢回家馳驛乘轎副使姚祥赴任檀越人夫馳驛俱奏之捕下獄崔某姚祥枷於西長安門外張偉枷於通州張家

灣公卿奏乞寬宥始釋充邊衛軍自是內外諸臣皆重足而立欲謝政去而不可得矣

劉瑾用事以天下巡撫官非舊制又如天順間曾革罷矣將各處巡撫都御史俱取回惟邊方及漕運都御史仍舊其餘衙門添設官員悉裁革不用其增減南北進士名數頗為得宜及取南京戶部茶鹽引由契銅板赴北京戶部掌管最合舊制

正德三年戊辰春天下諸司官赴京朝覲劉瑾令每布政司送銀二萬兩瑾等分用皆借貸於京師巨家及回任括民財倍償之上下交征莫有紀極

劉瑾素知邊方召商賈納糧草情弊因戶部覆奏給事中御史三年一次查盤回奏內有糧粗粃草沴爛者瑾票旨逮繫巡撫都御史管糧郎中下獄旣而鎖扭差人押至所任地方加倍賠償允商人納過糧草拖欠價銀皆沒官不給由是商賈困弊邊儲漸乏劉瑾因戶部奏送各邊年例銀兩瑾以為祖宗朝無此例命戶部尚書顧佐查天順年以前年例銀數佐以天順前無送銀例回報瑾大怒曰此戶部官通巡撫邊方都御史共盜內帑銀兩之明驗也悉追問致罪革職送銀之例邊儲至是缺甚蓋自成化八年開

設榆林衛余子俊巡撫增置城砦陝西民供不繼奏  
送江南折糧銀以補不足然初亦以江南原折銀例  
每米一石折銀二錢五分放支軍士其後大同等邊  
缺乏亦暫送銀補足數皆不多未有以萬計送者弘  
治初戶部尚書葉淇與內閣徐溥同年最厚淇淮安  
人益商皆其親識因與淇言商人赴邊納糧價少而  
有遠涉之虞在運司納銀價多而得易辦之便淇遂  
奏准兩淮運司益課於運司開中納銀解戶部送太  
倉銀庫收貯分送各邊益價銀積至一百餘萬兩人  
以為利而不知壞舊法也蓋洪武永樂以來天下益

課俱開中各邊上納本色米豆商人欲求鹽利預於  
近邊轉運本色以待開鹽報中故邊方粟豆無甚貴  
之時今廢商人赴邊報中之法雖曰得價多而近邊  
米豆無人買運價遂騰湧正德五年侍郎叢蘭整理  
陝西邊儲遂令百姓每名徵銀二兩伍錢准米一石  
蓋六部政本少有差錯貽弊如此使顧尚書當劉瑾  
查問之時答曰昔鹽課在各邊上納故無年例銀之  
送後改鹽課納銀解京故不得不分送各邊如此瑾  
必不怒而反正鹽法必不受其禍矣  
劉瑾既止各邊送銀又禁商人報納邊儲遂大匱乏

因詢國初如何充足淺識者以為國初屯田修備故軍食自足後為勢家所占以此軍不自給璉遂慨然修舉屯田分遣胡汝礪楊武周東顏順壽等往各邊丈量屯田以增出地畝甚多及追完積逋者為能否則罪之又命散銀於近邊州縣百姓買米賸脚耗運送邊倉交納奉行苛刻人不聊生偽增屯田每至數百餘頃悉令出租周東在寧夏與都御史安惟學比較屯粮尤嚴加刑於軍官妻子人心憤怒指揮何錦等遂與安化王謀起兵傳檄以誅璉等為名璉禍自是起矣正德三年劉瑾行事益務嚴刻動用一百五

十勛大加勅示衆給事中安奎御史張或因盤糧數不明枷於東西長安公生明門外時暑雨晝夜不輟莫敢少移都御史劉孟到任遲延亦枷於吏部門外文臣垂首喪氣惟恐獲罪給事許天錫郝夔因事皆自殺主事王守仁抗章論璉等專權亂政璉矯旨撻於朝堂不死降謫貴州驛丞守仁由此名聞天下正德三四年間璉等用事中外憤怒有偽黔國公檄書又作魏國公檄書者皆以誅璉等為名又有作檄書以應天府上元縣生員狄元出名者吏謄寫於公生門外鬻之璉邏卒得之捕吏下獄拷訊所從得展



轉攀指竟不知其由乃遣官校詣南京上元縣求之亦無狄元名姓說者以為狄者夷狄也元者胡元也寓意於此耳又一日早朝畢御道遺一紙帖上親見之命拾以進乃言瑾等亂政事瑾下殿入班分五品以下官出午門外跪聽處分至午後不放時六月盛暑熟死者十餘人復下獄追究竟無所淨

弘治間內閣劉健河南人李東陽湖廣人時仕宦顯達者河南則有馬文昇許進劉宇焦芳李騷湖廣則有劉大夏王儼熊翀等健與文昇等雖同鄉而不阿比文昇兵部每以軍職官不堪委任欲添設兵備按

察司官監之徒屢止之票旨不准後因奏設九江  
倭兵科都給事中夏祚論之令文昇回話認罪許進  
為戶部侍郎同平江伯陳銑統師出宣大禦虜失時  
嬰城自守無功罷進職致仕焦芳為吏部侍郎建言  
禦虜四事健票旨云這本所言窒碍難行以為愧李  
遂為鴻臚卿年深止轉南京太僕少卿文昇薦劉宇  
總制宣大軍務時劉大夏為兵部尚書與文昇宇有  
隙因孝宗召見言宇在大同私養官馬餽送權貴  
上密遣錦衣百戶邵琪往察之以養馬未送回奏司  
禮監太監李榮亦河南人解之得免究東陽與大夏

同時為庶吉士。極相厚。王儼與大夏姻親。熊翀以廉  
著。由山東布政巡撫。延綏陞兵部侍郎。大夏拔起。王  
儼由陝西布政巡撫。山東陞戶部侍郎。文昇時為吏  
部尚書。欲抑王儼。引進劉宇。不得。遂一日。兩廣巡撫  
缺。文昇首薦熊翀。聞徑造吏部。辨之。守後門。吏不為  
通。翀即撻其吏於門外。後翀陞右都御史。巡撫兩廣。  
由是東陽大夏深憾之。諷使同鄉御史何天衢屢疏  
論之。遂令致仕。劉健在內閣。居首。河南信陽州人。何  
景明年少能詩。人以為首相同鄉。必選入翰林。無疑。  
健以此子福薄。能詩何用。不取。後景明除中書舍人。

官至提學副使不壽卒自來居內閣不黨比故奮僅  
見健一人而東陽以神童舉與敏政齊名然專以詩  
名延引後進海內名士多出其門往往破常格不次  
擢用寢成黨比之風而不能迪知忱詢舉用真才實  
學當時有識之士私相講論以為數年後東陽柄用  
引進一番詩文之徒必誤蒼生尚名矯激世變將起  
後李夢陽草疏急欲殺劉瑾等而謀慮不審且疏中  
既以甘露之變為言而躬自蹈李訓等之淺謀致貽  
數年衣冠之禍中官自為制度自比不可變更且草  
疏者李夢陽一部屬官耳而諸司英朋傑士平昔以

文章氣節取重於世者翕然和之韓文亦素與東陽交厚在名士之流夢陽所作詩甚為東陽所賞鑒故文不敢少遲夢陽之奏而九卿大臣景從文後亦不敢畧出商量萬全之策皆氣節之盛使人不敢致思也後文因事繫獄罰米千石輸邊二子皆罷官夢陽亦下獄人以為禍出不測劉瑾家人老姜者告曰昔公不得志時李主事管昌平倉曾容吾家納米領價得利乃忘之乎瑾遂釋之令致仕仍贈以物曰後當復用東陽善終贈太師謚文正人之禍福不可測如此

劉瑾性極貪酷而假竊仁義沮抑同列馬永成欲陞  
百戶邵琪已得旨瑾力拒以為不可爭於上前谷大  
用聽鎮守臨清太監言傳旨於臨清開設皇底瑾急  
捕其獻計者置於法東廠太監丘聚忤瑾密奏聚交  
通外臣調南京孝陵太監王瑋於御馬監建新宅  
誘上居之因奏令攬納戶數人專一包納京倉糧  
草所得利進於內瑋自為旨送戶部出接尚書顧佐  
等白于劉瑾谷大用瑾大怒同谷大用直至御前  
言安有天子令人包納錢糧之理上以為然瑾  
遂枷其攬納戶於戶部門外命銍其枷不得屈伸即

日死然亦不能加璫罪河南鎮守太監廖堂奏舉三  
司官賢能并劾不職者時因吏部尚書許進奏鎮守  
太監舉劾官非例璫出旨禁之遂不行後璫聽譖斥  
去進歸河南靈寶廖堂欲奏其居鄉不法事挾取財  
物深被其害璫之速敗以此向使璫等凡事和同其  
為禍豈至正德五年而止哉

劉瑾欲專權盡除軋已者一日伺隙言於上調張  
永南京奏既可即日逐永出就道榜諸禁門不許放  
張永入永知覺直趨至御前訴已無罪為璫所害  
召璫至語不合永即揮拳毆之谷大用等解之令諸

近臣皆置酒和解由是利深憾璵會寧夏事變檄書  
首以誅璵為名且曰非敢竊窺神器也衆舉永并楊  
一清徃征之未至為變者已被獲永等至寧夏回謀  
于途必因此陷璵既至京內外頌永功因張雄張忠  
等共訴於上前以謂璵激變寧夏心不自安陰謀  
不軌其形已具宜早處之上猶預未決衆曰少遲  
我等皆為齏粉陛下安所之乎上允其奏命牌子  
頭璵衆勸上親行至璵宅近地觀變時渴下三  
鼓璵方熟寢令牌子頭入問曰上安在對曰在豹  
房璵披衣出謂家人曰事可疑矣出門有牌子頭數



劉七

人執瑾就內獄黎明送錦衣獄坐以謀反凌遲處死  
悉誅其家屬抄沒財產京師稱快咸頌利功  
正德間內官得寵用事者劉瑾陝西興平縣人谷大  
用馬永成張忠等皆霸州文安諸處人大盜劉七等  
嘗因內官家人混入禁內至豹房觀上遊幸之所  
及為竄果所逼遂聚衆拒捕瑾誅果亦得罪繫獄當  
時若遣驍將五人各統勁兵一千分路而出聽其便  
宜襲捕惟以平賊為功不論首級多寡不過旬月而  
平矣時兵部尚書王敞不通政務止行有司擒捕已  
獲齊彥名收安肅縣獄劉七等十餘人劫出旬日之

間聚至數百所至窮民響應增至數千畝束手無策  
楊一清為吏部尚書建議推用大將征討及文臣有  
才望者提督軍務又著令有能擒斬盜賊三名顆者  
陞一級李東陽送中票旨極其褒美悉從所言之  
故事凡大政必下該部詳議覆奏然後施行今捕盜  
不關白兵部徑准施行由是言官爭論畝不職乞速  
罷黜張永素悅畝不能留令畝掌通政司事以何鑑  
代之一清舉巡撫大同都御史馬中錫提督軍務惠  
安伯張偉為總兵官同征流賊所領京營人馬皆不  
簡閱中錫書生欲效龔遂化渤海盜事畝撫令解散

張偉統縉之子亦不知兵既出兵中錫遣檄諸路榜示劉六等經過所在官司不許捕捉與供飲食若聽撫待以不死劉六等聞之所至不殺掠然且信且疑中錫至德州桑園兒駐兵劉六等來謁中錫開誠撫之劉六欲降劉七曰今內臣主事馬老爹豈能自踐其言乎潛使人至京師探諸中貴無招降意又以山東所劫金銀輦載赴京饋權倖求赦不得遂大肆劫掠衆至數萬中錫故城縣人賊至故城戒令勿焚劫馬都堂家房屋財帛由是謗騰謂中錫恐賊害已家玩寇傷民遣錦衣官校捕中錫張偉下獄罪論斬後

中錫死獄中張偉輩當時閒住中官因是以為此事非書生所能辦乃命太監谷大用總督軍務伏羗伯毛銳掛平賊將軍印充總兵官所統兵萬餘亦未簡閱而大用擁衆自衛高坐堅城行至真定所屬地方遇劉七等交戰大敗損折官軍喪失輜重無算又失將軍印附馬游泰子隨銳冒功亦被殺適宣府遊擊將軍許泰領兵至救援銳僅以身免罷回京以興谷大用同事因不問銳失律喪師之罪

自古論治道者皆曰明是非公賞罰而不能見於施為著於實效正德六七年間盜賊四起當道者不能

預知中外武備廢弛不可用當專用驍將選勁兵討  
平之因賊攻破曲阜縣犯關里李東陽女嫁符聖公  
子聖公言於東陽以為布按二司守巡官迂迴避賊  
見城破不救東陽怒始下守巡官獄黜為民及谷大  
用等既出師何鑑奏山東巡撫都御史邊憲真定巡  
撫都御史蕭昶撫馭無方皆差官校拏解赴京問以  
失機既而釋為民又著令州縣官被賊攻破城池比  
守邊將帥律抵死彼時廟堂諸公自以為公行賞罰  
而不知盜至十萬非巡撫布按二司官及州縣官所  
能制是時州縣官有被賊殺者皆以節義旌之如棗

強縣知縣段豸自城上跳下墮水死贈官廕一子世襲錦衣百戶延綏叅將馮禎被賊射死封伯爵廕子錦衣百戶寧夏叅將仇鉞因捕獲何錦等已封咸寧伯至是逐散河南流賊趙風子等非有攻城畧地之功乃因是進封咸寧侯世襲都御史馬炳然挈家由浙江歸四川為劉七等所掠殺死亦贈官廕子皆當道諸公不學無術而又難以私意行之宜乎政刑紊亂而禍患相踵未已也蕭翀邊憲罷官未二三年復起用邊憲巡撫寧夏蕭翀巡撫陝西是非賞罰果有定論乎

自昔已然

谷大用陸完毛銳統兵討賊毛銳喪師不加罪自出  
師後賊益熾攻城劫獄殺人放火益多皆不責問奉  
職不效之罪惟以斬獲脅從首級報捷論功冒賞完  
陞右都御史官軍與賊交錯往來燕趙齊魯之區一  
年餘而谷大用等奏帶權勢僕從坐冒首功日費廩  
餼又紀功給事中柴玉吳榮御史吳堂雷宗皆得干  
預兵事調度民兵各為戰守官軍數百里外函首送  
驗巡撫山東都御史張鳳急送民兵令自負馬團操  
拖挖坑塹督責布按二司官尅期完辦巡撫真定都  
御史寧杲召募無賴數千衣糧器具取給州縣事煩

民擾其害過賊之半巡按山東御史張璠真定人積  
不能平奏論谷大用陞完等師久無功地方受害疏  
下都察院都御史王鼎奏乞令兵部差官勘究何鑑  
護短不行黨完者嗾御史以他事論鼎不已遂罷歸  
竟以完代鼎

漢於張掖郡置金城屬國以處蠻夷降者又於匈奴  
昆邪王故地置酒泉郡隔絕匈奴與羌酋通路宋為  
西夏所據國朝於張掖設甘州五衛於酒泉郡設肅  
州衛命將屯兵拒守肅州外為嘉峪關關外蠻夷各  
因其種類建衛曰赤斤曰苦峪曰蒙古曰安定曰沙



州曰由先曰罕東罕東左降給印信各命其酋長管  
東夷衆內附肅州外捍達賊又於肅州外千里許建  
哈密衛授官降印如赤斤諸衛之制而擇其番酋之  
效順者封為忠玉降以金印令其世守哈密外通土  
魯番撒馬兒罕夫方國諸夷朝貢往來自古據有河  
西修飭武備羈縻羗戎之法惟本朝最為精密守臣  
相繼撫馭諸夷一遵舊制不敢生事啟釁所以百五  
十年來西陲晏然無事弘治五年哈密衛都指揮阿  
木郎與達賊野也克力引路搶殺土魯番人畜又將  
賞賜土魯番衣服尅留土番王阿黑麻率衆來哈密

刀裂死阿木郎陝巴係土魯番親枝不知阿木郎所  
為不恐殺攜歸土魯番由是哈密失守 朝廷命侍  
郎張海往經畧之海素有學術至彼上言遠夷不可  
加兵來則厚撫叛則拒絕之而已 朝廷用其策至  
弘治十一年阿黑麻因不得通貢自將陝巴送回復  
立土魯番通貢如舊

審齋瑣綴錄

永樂初選翰林文學之臣六七十人直文淵閣叅典機  
務詔冊制誥皆屬之而膳副繕正則中書分直更入  
事竣輒出宣德間三楊諸先生始置厨饌於閣之東

精微進呈章奏也

偏而選能書者處以閣之西小房謂之西制勅房諸學士則居閣之東五楹專管誥勅具稿定正於閣老乃付中書繕進謂之東誥勅房而帶知制誥衙則惟閣老與諸學士而已中書等官不敢僭也時諸學士每早與閣老會食乃退正統九年陳芳洲先生入閣後學士惟劉鉉先生一人過自遜避朝退止於東閣不復會食視誥勅以後學士皆因之至今誥勅閣老悉委於中書序班譯字等官依樣畫葫蘆矣

五府六部都察院精微皆送翰林注銷掌於學士陳芳洲先生入閣兼掌翰林印則委於博士與稽待詔

侍書等官猶是也。至天順二年，博士以下官悉缺，則直付於東誥勅房中書郎中等官矣。而繳進文移，則代署學士職名耳。

四夷館本屬翰林院提督，每月朔，掌印學士僉押公會簿送館，自提調教師以下，日晝卯酉，月終送院稽考。譯字官并子弟吏禮二部移文會同本院學士，無不與焉。成化己丑，禮部偶失請，掌院事者怒，不之與。至今文移徒屬學士，而會考則一歸於閣老矣。

文淵閣本翰林內署，非衙門名，故允。朝廷之宣召諸司之文移，雖事關机務，亦止稱翰林院，或稱會同。

翰林堂上官初不以內閣名比年以來則直稱會同  
內閣大臣而翰林堂上官不道及矣後進朝紳之不  
習事體大率類是今翰林院外署本鴻臚寺舊址建  
於正統七年而印則造於六年也初落成日諸學士  
皆到任錢文肅先生掌印不設西楊南楊二先生公  
座曰此非三公府也至期二楊以聞乃命工部具  
椅案胡宗伯定位次二先生始自內閣出就座時論  
雖避文肅然二公所供職則固翰林事也

永樂間嘗選舉人監生習四夷譯書閱其妨曠本業  
乃命會試卷尾識譯書數十字三場畢送出翰林定

去取仍送入場填榜蓋優典也然既登第仍官館中  
習譯書如許道中先生是也至景泰初吳禎以民人  
充譯字始援此例中鄉試及登第又以與脩寰宇通  
志成從衆庶吉士出授御史成化間俞瓚又因此例  
授主事於戶部蓋資稍可進輒習舉業而譯書不復  
精徒籍為科第之捷徑故爭趨者天順八年彭可齋  
始建白如制去取於內不復送出院矣

景泰間予以庶吉士與修寰宇通志一日同彭彥實  
往文淵閣之東如廁適值少保芳洲陳公亦來予兩  
人却立公疾行而過顧予兩人笑曰以緩急為序他

日公入廁周堯佐贊善先在内公戲曰人生何處不相逢觀此二語公之澁容善謔風流醞籍盖可想

見

景泰間朝廷命揭纂修官職名於文華殿壁時命中貴詣館促完書或取稿御覽每遇上林南苑進時新菓品輒頒賜館中多至五六篋旋報閣老同行禮畢乃啟黃封品分以歸又嘗賜燒猪烝羊上樽宴勞於東閣皆霑醉直幸與被其榮盖一時恩意勤渥前此無有也

國初革中書省不設宰相永樂初乃設內閣選翰林六七儒臣居之職知制誥日備顧問對叅決政機隱然

王振

相職而官不過學士洪熙初始陞孤卿皆潛邸舊人而三楊同官最久當是之時干戈甫定宗室未蕃軍職尚少經費無幾國用有餘民間人稀地廣法網未密財利無制宣廟英武乾綱獨斷百司守令久任不更官民相安天下號為太平三楊之名所由以著時福建僉憲廖謨杖死驛丞事東楊以鄉官欲坐償命西楊以鄉故欲擬因公互爭不決請裁於太后王振因而進言三楊皆有私償命過重因公過輕宜對品降調府同知太后韙之自是振日据據內閣之誤裁決一歸於振三楊乃迭請告展眷遠宗室中



正論

有遺東楊土物者。掘將發其事。西楊以東楊不在京。辯解之。東楊聞報。兼程造朝。觸冒瘡疹。卒於錢塘。以此掘權益專。好大喜功。遂因麓川思機發。思仁發。兄弟讎殺。遽有麓川之征。遣將出師。疲耗中國。濫賞爵賞。所爭荒夷之地。竟何益於國家。乃致九溪苗獠乘勢不靖。兵連禍結。延至葉宗流。鄧茂七。黃蕭養輩。相扇而起。極於土木之大變。此皆三楊失柄於初。不能沮振之所致也。然西楊之文學。東楊之政事。南楊之清雅。皆人所不及。故論今之賢相。必曰三楊。三楊蓋所善者多也。

永樂間禁中凡端午重九時節遊賞如剪挪諸樂事翰林儒臣皆小帽襖襪侍從以觀觀畢各獻詩歌詞上親第高下賞黃封寶楮有差至宣德間猶然以後閣老與諸學士卿亞間與焉以下儒臣不復近而應制之作罕聞矣

景泰間朝廷銳意欲作續通鑑綱目佇俟志書完日開館時諸閣老乘間詆本院官怠緩完期不可必因各薦所知於是丁叅議瑄等皆被召聶大年教授扶病入館退食松林下經宿而死其中病如章主事諫老如劉治中實劉宣化先生因譏之曰生老病死

廿史館脩矣一日丁叅議與宋尚寶懷尚氣失色忿  
詈於館中陳緝熙遽成一詩云叅議丁公性大剛宋  
卿凌慢亦難當亂將毒手拋青史故發僉言污玉堂  
同輩有情難勸解外郎無禮便傳揚不知班馬韓歐  
輩曾為修書開幾場明日二人聞之悔恨自解謝曰  
毋更貽斯文笑也識者以是知此書畢竟無成蓋執  
筆者多非其人也

仁廟在位時一日內臣道及太宗皇帝晚年欲立  
趙府為儲諭意於東楊東楊即對以趙府面鼻欹側  
不宜正位遂宣趙府熟視頃之意頓罷仁廟聞之

卽日降內批陞東楊少傅兼謹身殿大學士西楊潁  
卣懷進請加太子二字於少傅兩條乃傳出未幾復  
陞兼工部尚書夫立趙之意素所未聞豈內臣假以  
為東楊地乎而加太子二字西楊亦未必然厥後  
宣宗因東楊便殿奏對手執其牙牌曰今在我身邊  
如何尚帶此牌可卽去了太子二字東楊遂叩頭謝  
後實錄完乃同西楊進少師

正統中具祭酒以賊罷西楊先生與李古廉先生對  
奕因嘆祭酒缺員難得振作者古廉荅云不可謂無  
人惟朝廷所簡任耳時程南云在側遽稱李先生

豈不宜於此任古廉喟然曰胡說胡說明日有旨古  
廉為祭酒初古廉與陳敬宗在翰林袁柳庄嘗曳二  
人並列曰二公他日功名相將時陳公儀貌魁梧而  
古廉頗短小聞者未之信後陳公以方嚴肅下古廉  
以忠恕得士聲望聳然柳庄之術信有驗矣

正統中宗伯胡公浚一日早朝承旨跪起帶解落地  
從容拾繫之遂叩頭還班御史亦不能糾十三年彭  
可齋中狀元當上表謝恩之外坐以俟旦至四鼓乃  
隱几不寤竟失朝糾儀御史奏令錦衣衛拿已奉  
旨公從容出班奏狀元彭時不到不合着錦衣衛尋

上是之不然一新狀元遂被拘執如囚人斯文不雅  
觀矣老成舉措自得大體於是可見

英廟復辟之初允與擁戴者皆得陞職謂之奪門功  
次每早鴻臚宣謝恩姓名輒以奪門為題識者聞之  
無不嗟惋予私與彭純道先生言所奪者何門禁門  
豈可奪當時景帝果薨群臣萬姓不能不擁戴

上皇以復寶位何煩用兵喋血於禁耶况當日景  
帝已擬力疾出視朝若南宮出稍緩事即不成不知  
石亨輩置上皇於何地此乃僥倖貪天之功非萬  
全之策而今乃以奪門歸其功果何謂邪於是彭先

生間言於李公允德公時亦以張賜薦入內閣未悟至此及聞此言亦為悚然遂於顧對之餘後容言之上頓悟即加踈絕亨輩反怏怏怨望竟致誅夷而陳芳洲諸公從此得釋

天順初元會試同考官多出於權貴所薦引及揭曉日錄文謬誤去取徇情謗議洶洶無名詩詞紛然雜出一排律云 聖主開科取俊良主司迷謬更荒唐薛瑄性理難包括錢溥春秋欠主張吳節中郎只知貪賄賂孫賢全不曉文章問仁既是無顏子配祭如何有太王告子冒名當問罪周公係井亦非常閤老賢

卽真慷慨總兵令姪獨軒昂榜上有名誰不羨至公  
堂作至私堂蓋許道中之子及石亨之姪皆以私取  
而錄文則語題節去顏子起克已復禮為仁孟義本  
公都子之言而云告子故詩中備言之

永樂乙未科始開會闈於北京泊菴先生主考得一  
卷三場俱優取定為會元拆卷乃陳芳洲循先生以  
鄉故為嫌欲取林文枯字難識進呈不便因見第五  
名洪英曰此洪武間英才也遂取為會元而循居二  
王翱第五 太宗見翱名喜北京初啟會闈而經魁  
得一畿甸士遂以布衣召見賜酒飯後翱至宮保太



宰壽祿名位非常可及遭際有自來矣

今制早朝班定鳴臚宣贊謝思見辭行禮畢各官將奏事皆預咳一聲文武班中不約而同聲震如雷俗私謂之打掃其有痰咳不可忍者許引退自便宜德間曾子榮先生痰咳作引退上遙見之勅免其常朝成化中文華殿經筵戶部尚書馬昂以將咳退出殿外俟講畢仍同行禮此余所親見餘未見有敢先退者蓋昂初嘗為序班故尚習此例其他見此不以為異則以為失儀矣

李文達公初薦布政陸瑜為刑部尚書石亨以私譖

之久不召對衆為公危及瑜至常擬旨到任同事者  
謂且擬侍郎公曰吾以尚書薦而改擬侍郎則自嫌  
不信矣竟擬尚書從之後瑜頗稱旨乃復召對如舊  
天順中李文達公獨見寵任時冢宰王九臯以老成  
大司馬馬昂以儀表雖皆為英廟所眷遇而尤賴  
公所維持凡公有所薦舉必先諭意於二公至御前  
疇咨時於文則諉諸王公武則諉諸馬公或既自舉  
其人亦必曰臣所知如此還須召某等再審二公亦  
如公言以是上不致疑下皆信服

朝廷用人多取儀表天順間韓都憲雍巡撫大同因

門達○

議事至京留補少司馬 英廟諭李文達曰大同巡撫須得似韓雍人品方稱文達以山東廉使王越對及越至陞見後復諭文達曰王越是爽利武職打扮越初廷試手中卷子忽被大風吹起而翔雲漢莫知所止時胡宗伯即具題知且於內閣取紙摺成卷子付之後越至封威寧伯蓋飛騰之兆見於廷試豐偉之儀見於進用固不偶然而卒以啟邊釁削爵惜夫天順七年錦衣指揮門達總督官校緝事兼鎮撫問刑權傾中外道路以目人莫敢言自計得以進言別是非於御前者惟李閣老賢與袁指揮樹二人而

已謀排去之乃据摺數十事上欲法行不以摺沮  
諭之曰從汝拿去問只要一箇活袁彬還我彬既下  
獄考訊苦楚莫能自白時有一藝人楊暄善倭漆畫  
器號楊倭漆者憤然上疏論救達欲并中李閣老逼  
楊供指為李所嗾楊懼考死於獄乃誑達曰此實李  
所教但我言於此無人證見不若請會多官廷詰我  
對衆言之李無得辭達信之明日遂遣二官徑詣閣  
門要李出午門聽對時李方自東宮講退陳安簡彭  
純道乃詰曾滄肯否曰未也且暫去一對二公沮之  
及至多官會問時楊大言曰死則我死我何敢妄指

人。我一市井小廝如何見得閣老鬼神昭鑒此實門教我指也。達失色以是彬得從輕調南京錦衣衛帶俸楊亦得免人義之李有澄兄任安慶府同知達又遣校尉往緝之務欲傾李尋以英廟上仙得免達坐劾請戍彬復職餞送達出城如禮亦人之所難也。南京國子監內號房皆無門限而成賢門門字無鈎。太祖謂秀才須出用不宜限隔故門皆去限且怒詹孟舉書門字有鈎即以粉塗鈎畫至今粉跡宛然。號房以規矩準繩綱紀法度為序每字二十間北監則以格致誠正修齊治平為序蓋各有取義也。南京文

武各衙門俱有牌扁直書衙門之名惟翰林院三字橫列而兵部獨無扁相傳洪武間一夕潛有掣去之者而莫知所自詰旦具聞上不之省蓋以示去兵之意至今不敢復揭

太宗兵駐金川門即命訪解公大紳既至甚喜始建內閣處翰林七人而公為首今內閣規制皆自公創及議儲未決乃召公預議公言立嫡以長繼曰好聖孫宸衷頓悟事遂定後丘福等泄此語於漢廢人怨譖不已乃調外任竟下獄解后以死固非朝廷之意實漢廢人之所為也

都憲韓公雍聰明才辨迥出流輩按江西時適聞廣  
廈州寇熒剽剌及境公設法擊却之當時巡撫侍郎  
楊寧稱於衆曰韓繡衣聰明百倍於小子官民奏留  
重按一年回朝陞廣東憲副不數月陞僉都御史巡  
撫江西年未三十民情吏治素所諳練風裁凜然凡  
臨衆決事動發百餘言皆引經據律無一語踈滯處  
置事務靡不允當至今官民遵守之曰韓都例繼公  
者皆以為不及嘗念陳芳洲先生為舉主赴鎮經泰  
和躬祭墓下流泣不已曰士為知己者死何能報也  
平江侯陳公瑄天資明敏善幹濟初公帥舟師扼江

○  
津時靖難兵至即濟以舟舟少乃折民居林編筏以  
延之後總漕漕運見河道兵民舟楫往來錯互衝塞難  
行創為溜頭楫簷以相避實為兩便至今人遵之  
正統間宮殿當綵繪計用牛膠萬餘觔遣官賫勅屬  
巡撫南直隸尚書周公忱如數辦供時公以議事赴  
京遇諸途勅使請公還治公曰第行自有處置至京  
言京庫所貯皮張歲朽腐請出煎膠應用回治即撥  
餘米買皮照數輸納以新易舊兩得便利太監王振  
欣然從之益加敬重

皇妣紀氏得幸有娠萬貴妃既覺恚而苦楚之上令



託病出之安樂堂以病報而屬門官照管旣誕皇  
子密令內侍近臣謹護視之及悼恭薨後內庭漸傳  
西宮有一皇子歲甲午春直偶與彭先生談及且  
請乘間言之或賜名付玉牒或訪其外家畧加表異  
使外庭曉然知之不然他日何以信服於天下也公  
唯唯至冬又談及之公荅曰近嘗託黃賜太監具達  
至云漢高外婦之子且明取入宮今實金枝玉葉何  
嫌而諱上乃諭黃賜汝上覆先生是有一子在西  
宮俟再打聽直歸竊欲建白請睿名以示外庭稿具  
復慮萬一允請因而見忌致有疎虞則荅何辭老氏

福首禍先斯所當鑒且度皇子日長中外已籍籍當有發之者溪侯予言遂已至是太監張敏厚結貴妃主宮太監段英乘間說之貴妃驚云何獨不令我知遂具服進賀厚賜紀氏母子擇吉日請入宮次日下勅定名徙紀氏處西內永壽宮禮數視貴妃中外臣僚喜懼交并而張敏者以為已功皆受厚賞敏因監督操練示欲立意於諸總兵又令內史郭鏞致手簡託序班嚴冠英來諭意於予即具請奏稿呈商先生商止予勿進遂會禮吏二部議定具奏僉文武各衙門堂上及學士官名而以英國公為首六月七日

早本進即命司禮七太監宣四閣老至中左門擬旨  
少頃七太監同持本出奉天門集百官以本授英國  
公曰聖斷實御筆親批云覽奏具悉卿等忠愛但儲  
貳事重姑俟皇子年齡稍長行之明旦復宣四閣老  
至文華殿諭之曰皇子頗會讀書待他進些學且遲  
遲商閣老獨對數語請謹保護至於衆意欲請皇子  
母子同處別宮庶脫虎口則未敢云蓋恐相激時紀  
妃有病命黃賜張敏將院使方賢治中吳衡往治萬  
貴妃請以黃袍賜之俾得生見次日病少間自是不  
復令人診視至六月二十八日卒是日天色皆赤以

特享致齋七月朔始發喪追封淑妃

正統中都御史陳智性剛而躁嘗坐堂偶有蠅拂其面即怒叱從者拿從者紛然東奔西突為遂捕之狀少頃俟其怒解稟問拿何人乃叱之曰是蠅有相知者以寬緩為勸即置一木簡書戒暴怒三字於上置諸左右以自警及至有觸忤者輒舉木簡撻之一日與掌順天府事工部侍郎李庸在朝議事不合相忿詬朝廷遂兩罷之

太宗文皇帝初駐金川門蹇夏二公首出迎戴而解胡二楊諸公則以召命至然皆不自靖而竊自比於

正論

魏徵夫唐實由太宗化家為國而宮僚魏徵等皆出唐高祖之擢建成未登大位統天下故魏徵去事秦王不自作焉今建文嗣統五年蹇夏二公當時執政大臣出於建文所親擢視魏徵之於建成殊不類況當時群臣中如周是修之死我太宗有彼食其祿自盡其心之旨聖意所寓深矣今二公乃安然狗冒何其忍也後雖有輔佐微勞難蓋前愆大節已虧而猶謂之名臣士林莫有非議之者予則獨不韙焉其中惟解公纔歸自謫所所居冗散則其責任又非蹇夏諸公比其亦薄乎云耳

太宗渡江時解胡金三先生與楊文貞周是修相約  
自盡於應天府學既而解先生使人覘胡動靜因得  
胡先生如廁回問家人曾飼猪否解先生笑曰一猪  
尚不肯捨豈肯捨性命蓋皆初無意於死也惟是修  
竟行其志哀哉文貞為之著傳以表見於後也然文  
貞寔以解薦而文字中絕不語及歸省過文江僅以  
白金十兩壽解夫人爾

吾泰和蕭子韶蓋木匠之子洪武初登第高皇帝  
問其家世對以一絕云嚴親曾習魯般機當年製下  
青雲梯腰間帶得純綱斧要斫蟾宮第一枝陳善芳

由戶部主事謫戍陝邊慶王問其出身對一律云令  
主從容問出身草茅原是布衣臣戊辰歲貢三千士  
庚午秋闈第四人列職地官階六品承恩天府僅  
三春戎衣再際風雲會始信儒懷席上珍後復起為  
知縣尋致仕

吉水灘頭一豪家造樓占踰其狐姪嫠嫂地基僅一  
間其狐嫠吞聲忍氣惟旦夕焚香稽首籲天弘治二  
年五月十八日夜忽大雷電風雨移其樓空其地以  
歸狐嫠至曉人視之不失尺寸神矣哉此可為欺狐  
弱寡者之戒

巽齋歐陽先生始登朝縉紳士林意以六一先生廬陵人也代出名公必為望族巽齋以欺人欺心為耻力辭非六一之派且曰人當自立豈可冒他人為重此巽齋所以為賢而崇韜之為可耻也彼不羞盤瓠犬也不辱於菟者又可知矣

成化己亥秋遣太監汪直監督軍務征建州衛初文廟以女直種類歸款分置建州女直毛憐海四等衛各授指揮等官所以渙其群俾不相統攝以共戴中國外禦北虜誠以夷攻夷之上策也歷歲朝貢間有寇邊不為大患惟嚴飭守備來則逐之耳成化初



守臣以建州寡弱貪功賞請兵征勦至是鎮守副都御史陳鉞又說汪太監立功固寵已亦倖進虛張邊警妄請出師汪主於內遂命撫寧侯朱勇掛印總兵鉞提督軍務汪便宜生殺陞賞時建州頭目六十餘人來貢遇汪於廣寧汪誣以窺伺馳奏請拘囚之既至給就鴻臚演禮入門伏起三校擒一格聞擾攘困乃就縛監禁在衛虜衆不意大軍猝至壯者逃匿惟餘老弱或殺或虜旋凱獻俘汪將入城諸大臣皆遠逝上御文華殿以俟論功陞賞汪加祿米三十餘石勇進爵保國公鉞進右都御史未上改司徒郎中

王宗彛以督餉陞太僕少卿尋改僉都鎮遼餘進階有差未幾虜以復讐為詞屢侵邊堡搶去男婦碓舂火蒸支解以殉屯堡屏跡弗克耕種遼地騷然識者憂焉

成化丙申予佐禮部林一鶚佐刑部一日謝宴賜恩於午門外一鶚伏而不能起予掖起之一鶚遂以病告予同俞振恭往問安一鶚喘息嘆曰病將三月當佳俸矣振恭曰盍告歸宜水土便醫治固可愈也一鶚默不應明日報卒予因嘆曰一鶚不慮病不起且慮俸當住蓋以廉貧之故可惜也

宋夏鄭公綽在朝數被御史糾劾疑承時宰風旨作  
青雀詩云青雀孤飛毛羽單卑棲豈敢碍鵝鸞明珠  
自有千金價莫為他人作彈丸

仁廟在東宮時嘗觀二內侍象奕因命曾子棨先生  
應制詩云兩軍對敵立雙營坐運神機決死生千里  
封疆馳鐵馬一川波浪動金兵虞姬歌舞悲垓下漢  
將旌旗逼楚城興盡計窮征戰罷松陰花影滿殘枰  
仁廟和云二國爭強各用兵擺成隊伍定輸贏馬行  
曲路當先道將守深宮戒遠征乘險出車收敗卒隔  
河飛砲下重城等閒識得軍情事一着功成見太平

詞意宏偉尤勝前詩君臣之器量見矣

景泰甲戌廷試第一甲孫賢面黑徐溥面白徐輅面黃時謂鐵狀元銀榜眼金探花

今制東宮官名多襲古如庶子洗馬是也景泰間劉主靜陞洗馬兵部侍郎王偉戲曰先生一日洗幾馬主靜應聲答曰大司馬洗得乾淨少司馬尚洗不乾淨衆聞之噓然後主靜與李克述同陞庶子劉宣化戲謂主靜曰衆人皆是假庶子先生真庶子蓋主靜庶出聞之默然無以答

成化間四方白丁錢虜商販技藝革職之流以及士

夫之子弟率負緣近侍內臣進獻玆玩輒得賜太常少卿通政寺丞即署中書司務序班等職不由內閣吏部謂之傳奉官至於三閣老之子若孫甫髫髻以授中書冠帶牙牌支俸給隸但不署事朝參而出於梁方之門者一日內宴鍾鼓司承應粉一老人部糧責解戶米濕解戶答曰非我之罪此船縫之病老人曰便須塞了船縫免得耗濕朝廷糧米答曰若要塞船縫須是無糧方好天顏為之少霽晚年悔悟及予入閣因事諷諫遂皆革罷

成化間太監汪直用事朝紳諂附無所不至其巡邊

也所在都御史皆鎧甲戎裝將迎至二三百里望塵  
跪伏俟馬過乃興及駐館則易小帽曳敝裘走唯喏  
叩頭半跪一如僕隸揖拜之禮一切不行以是皆見  
喜遂得進陞工部兵部戶部侍郎時有諺云都憲叩  
頭如擣蒜侍郎扯腿似燒葱奔轅之甚良可嘆也  
解學士先生嘗弔友人喪妻入門曰恭喜繼曰四德  
俱全七去咸備嗚呼哀哉大吉大利聞者絕倒蓋其  
妻悍也予嘗觀之崔冢宰之妻李尤悍崔慄慄畏順  
至怒輒跪起拜謝以冀免蓋恐傳笑於外而益養成  
其惡崔後至冢宰李病將死尤聽候省視不敢違及

卒後妾得專房遂生二子不至絕祀豈非大吉大利之可哂耶

弘治中太監李廣以左道見寵任權傾中外大臣多賄求之戊午歲建毓秀亭於萬歲山上旣成後適一小公主患痘瘡衆醫莫效廣飲以符水遂殤宮中方歸咎於廣未幾清寧宮灾有謂亭之建年月不利犯坐殺向太歲故有此灾太皇太后怒云今日李廣明日李廣興工動土致此灾禍累朝所積一旦灰燼廣惧飲鴆死訃聞上意其所藏必有奇方秘書即命內侍搜索奉命者遂封其外宅搜得一帙納賄

簿籍首進之簿中所載某送黃米幾百石某送白米  
幾千石通計數百萬石上因詢左右曰廣所食幾  
何乃受許米對曰黃米即金白米即銀因悟廣賦濫  
如此遂籍沒之科道請出簿籍按名究問凡與名者  
惶惧危甚各自星夜赴戚畹求救不期而會者凡十  
三人月下見蕎影童童而一人獨乘女蕎事雖得寢  
不究而納賄者之名一一盛傳於朝野覲顏惟甚久  
而亦安然無復羞愧矣賴上英明終漸去之  
士失之姓名動靜於朝廷之休戚未必有閼涉然  
往往有偶然之符如彭文憲公正統十三年及第當



上表謝 思之旦以起早隱几睡重不寤竟不及上  
殿時謂元首失了明年遂有駕留虜庭之變不亦失  
元首之識乎景泰辛未狀元柯潛人謂柯與哥同音  
未幾 英廟還自北虜退居南宮不亦哥潛之識乎  
天順癸未會試監試御史焦顯時予丁內艱起復途  
間竊謂宋有不因南省火安得狀元焦之語今焦監  
試能無忌乎未幾春闈果被火市謠曰御史原姓焦  
科場被火燒是皆偶然符合亦似有定數未可槩謂  
附會之說也

立齋閑錄

洪武壬子簡會試士張唯等十八人授編修等職入  
文華堂命灋為之師俾肄業上間至堂中取其文  
親評優劣命光祿給酒饌每食皇太子親王迭  
為之主給冬夏衣時賜白金鞍馬

上之十有五年詔立諸殿閣官以寵侍從儒臣之賢  
者於是金華吳公沉沉字由太史屬拜東閣大學士  
且親製誥文以授之

宋訥洪武十三年冬除國子助教橫經發難舉薊鄺  
塞學者如客得歸嘗同諸儒應制撰勅文畀僧道錄  
司領教事者十有六道訥援筆立成雅稱上意召

授翰林學士奉議大夫十五年冬陞文淵大學士會  
建太學成中外歲貢生徒日夥而職大司成者往往  
巽懦師生相奸教化不行宸衷簡注擢為祭酒陞  
朝列大夫以釐正前弊時十八年九月也其後師道  
既立大被賞遇

洪武二十七年三月初九日戊申陞行人司為正七  
品左右司副為從七品行人為正八品凡設官四十  
員咸進士為之先是所任行人多孝廉人林上以其  
將命四方往往不稱使旨至是始命以進士為之凡  
齎捧詔赦奉使外夷諭勞賞賜祭祀徵聘賢才賑

陳遇

濟軍務整點軍司等事則命之餘外奉旨諸司不得擅差而行人之權重矣

洪武十九年詔民間八十九十為鄉閭所推者賜爵有差貧不能養者日給酒肉歲畀絲帛著為令

陳遇字仲行居金陵元時江東明道書院山長教授溫州元季兵興歸金陵太祖渡江至金陵御史秦元之薦遇孝行才識上致書禮徵與語大悅俾典戎務籌畫三幸其第咨以機密授供奉司丞辭不就洪武九年首陳為治要道三授翰林學士皆辭賜肩輿校尉十人畀其出入除中書左丞又固辭上御

天下一人

李去東好

華蓋召入令坐草平西詔立成極喜賜宴重賞金銀  
段疋衣服等物除禮部侍郎兼弘文館大學士復辭  
除太常卿又辭疾上親賜藥命太醫院官醫治  
賜錦衣褥被粥米及瘥除禮部尚書又固辭上御  
奉天門召入命坐詢問典故時炎暑賜紗衣命引內  
福深沐賜宴上命令其子充宿衛亦辭屢蒙厚賞  
當時公候卿大夫無此寵遇也病復作上命太醫  
院醫治弗痊年七十二卒上再三哀悼賜棺木麻布  
米鈔塋次子恭天順間至工部尚書管柴炭遇後用  
子貴贈大理寺少卿

禮部議到合差行人事例開坐本月二十三日本部  
同各衙門官於 奉天門奏奉 聖旨是整點驛傳  
決罰有司審決重囚不許差欽此除外今將奏准事  
開坐劄付本司文書到日仰欽遵守施行須至劄付  
者合劄差開讀詔赦奉使四夷諭勞賞賜賑濟徵聘  
賢才整點大軍軍務祭祀特旨差遣不拘此例右劄  
付行人准此

永樂三年正月翰林學士解縉等選新進士俾進文  
淵閣進學得修撰魯縉編修周述周孟簡庶吉士楊  
相等二十八人時庶吉士周忱自陳年少願進學命

增忱為二十九人

永樂十四年十一月周王橚楚王楨相繼來朝例次日謁孝陵周王先至適遇節上命東宮皇太孫及小皇孫陪謁已出東華門上遽召翰林臣及至問曰二王東宮太孫及小皇孫謁陵展敬之位如何朕意雖畧定示爾三人試言之對曰周楚二王屬尊當列稍前兩傍東宮稍列後居中皇太孫列東宮之後諸王孫與太孫同班而分列兩傍上曰爾所言有據乎曰朱熹家禮大畧如此上行出片楮宸翰所書位次與士奇所言合遂命鴻臚丞周昇馳齎赴陵

俾奉行之

東宮傳 上命召使部翰林院官舉老成正大儒者  
侍皇太孫講讀明日特召蹇義及楊士奇義對曰兩  
人共舉部侍儀智然衆鮮知之議尚未決東宮云往  
者吾舉繼鼎大誤後悔無及智甚端正但覺老矣士  
奇曰雖頗老然起學官道理明執守正精神不衰目  
前廷官中未見其比是日午朝東宮以聞 上喜曰  
此得人矣雖老識朝廷大體能直言而不阿向元正  
日食呂震等皆欲行賀禮惟此老與士奇言宜免賀  
朕從之遂召禮部翰林諸臣諭曰儀智甚好朕知之



少男集卷之二  
令侍皇太孫講讀

永樂十一年置貴州布政司洪武年間止設貴州思南思州宣慰司管屬土民仍設都指揮使司衙門鎮守其地有鎮遠侯顧成在彼鎮守至是湖廣叅政蔣廷璽具奏開設布按二司將思南等三宣慰司地方改設六府安南陳日焜為黎季黎所殺季黎上表竄氏名為胡一元子蒼易名奩詐稱陳氏絕嗣奩為甥求權署國事長陵從其請逾年陳氏孫添平遁至京師愬其事季黎因表請迎添平還以國朝廷乃遣使護送歸其境季黎伏兵殺之并殺使者事聞遂命

征夷將軍成國公朱能副將張輔等征之能道卒輔至其地生擒季黎及奄等獻俘於朝詔求陳氏後立之國人咸稱為季黎殺盡無可繼承僉請復古輝縣遂立交趾都布按三司及各府州縣衛所諸司時永樂五年春也

太宗時禮部郎中周訥建請封禪群臣亦多言此太平盛事上皆不聽時獨胡廣言與上意合旣退作却封禪頌奏之

永樂七年某月文淵閣大學士兼右春坊大學士胡廣卒贈禮部尚書謚文穆公國朝文臣有謚自太

子少師姚廣孝與廣始也

太宗皇帝肇建北京勅翰林院凡南京文淵閣所貯古今一切書籍自一部至有百部以上各取一部送京餘悉封識收貯如故

文廟甚寵愛解縉之才置之翰林縉豪爽敢直言

文廟欲征交趾縉謂自古羈縻之國通正朔時賓貢而已若得其地不可以為郡縣不聽卒平之為郡縣仁廟居東宮時文廟甚不喜而寵漢府漢府遂恃寵而有覬覦之心縉言不宜過寵致有異志宣廟初漢府果反交趾亦叛悉如縉之言

永樂癸卯五月 太宗皇帝微不懌數日未出見群

臣 仁宗皇帝在東宮軍國政務悉啟聞施行邪僻  
傾險之徒不得騁其私誠所不便趙簡王時留北京  
敬修孝弟其護衛指揮孟賢等十數輩結曆官王射  
成等及內侍養子共構邪謀欲候宮車晏駕矯詔從  
中出立簡王而已得志焉實秘不令簡王知蓋憲不  
後即事敗壘粉而主其謀者護衛軍王瑜姁家高以  
正布置已定高密以語瑜瑜駭曰柰何甘為覆宗滅  
嗣計高不聽又涕泣戒之高怒而慮其泄也謀害之  
遂詣闕入疏 上初疑其詐緩曰豈應有是反覆詰

難衆為瑜危既捕賢等至 上親問狀得其邪謀本  
未及所造詐偽詔書立誅以正射成及內侍養子陞  
瑜遼海衛千戶後賢等皆伏誅瑜召還又陞錦衣衛  
指揮同知歷事 仁宗 宣宗 英宗官至左府都  
督僉事

禮部胡尚書濙嘗云 太宗命予使外瀕行諭曰人  
言 東宮所行多失當南京可多留數日試觀如何  
密奏來奏跪書字湏大晚至我即欲觀也予至南京  
且晚隨朝 勅免朝辭以不敢蓋凡所見殿下所行  
之善退則記之如一日趨朝勲臣某者語譁侍從槌

之仍口奏有 旨不問既退朝急宣侍衛者賞鈔若  
干錠於群臣皆悅言不顯責大臣而旌禁衛所以寬  
罪而愧其心見 殿下之明斷

太宗巡狩北京黃淮預扈從命兼行在禮部都察院  
事歲餘車駕親征北虜 宣宗以皇嫡長孫留守北  
京命黃淮輔導

永樂十五年年初建北京宮殿命都督薛祿董榮繕四  
夷館曰有八曰西天曰達達曰回回曰女直曰高昌  
曰西蕃曰緬甸曰百夷永樂中所設

永樂十九年冬 儲君自南京入 朝楊士奇黃淮

等侍北虜復犯邊 太宗皇帝將親征淮言邊儲不足請遣邊將無煩六師忤旨罷官 仁宗嗣位即日復准戶部尚書

永樂十八年十一月 仁宗為皇太子過鳳陽謁陵畢周顧陵旁見 仁祖淳皇帝所遺農器顧侍郎張本學士楊士奇曰國家帝業所自也徘徊久而後退陵下賜耆老酒饌有知 太祖龍興時事者留從容與語至夕曰知當時事者益鮮矣

十九年正月禮部尚書呂震言於 皇太子曰殿下前在南京數遣中使進奏牘每至輒以殿下過失上

聞而指其妄言。今宜踈此人。曰。過失。吾豈能無。今至尊。既不信之。我又與人計較也。耶。卒置之。

永樂二十二年十一月。賜衍聖公孔彥縉宅於京師。彥縉數來朝。皆館於民家。上聞之。顧近臣曰。四夷朝貢之使。皆有公館。先聖子孫。乃寓宿於民家。何以稱崇儒之意。遂命工部賜宅。

祖宗時。於文臣少有贈謚。至仁宗。登極。思念舊臣。賜禮部尚書鄭賜。太子少保謚文安。戶部侍郎王鍾。太子太保謚僖敏。禮部侍郎儀智。太子少傅謚愍節。春坊贊善兼翰林編修王汝玉。太子賓客謚文靖。春



坊贊善鄒濟徐善述俱太子少保濟謚文肅北京某  
部尚書朱濬謚文惠翰林學士贈禮部尚書文穆公  
胡廣加贈少師北京某部右侍郎楊泰贈戶部尚書  
太醫院判蔣用文袁寶俱贈院使用文謚恭靖洪熙  
元年四月有旨鄒濟徐善述王汝玉皆贈宮賜謚  
官建祠於墓四時賜祭楊士奇謂朝廷宗廟以四時  
享社稷孔子皆春秋二祭濟等安可與宗廟等遽召  
禮部春秋祭云

洪熙時初建弘文閣於思善門之右以儲經籍備訪  
問命楊溥等直其中凡四人翰林學士楊溥侍講

王進

蘇州人

翰林五經博士陳繼

蘇州人

吏科給事中王

榮

錢塘人

洪熙元年四月某日尚書蹇義夏原吉楊榮及士奇奏事奉天門畢上問夜來星變曾見否皆對以未見上曰蹇夏二人雖見不能知士奇當知之對曰士奇愚亦不能知上曰天命之矣嘆息而起又明日早朝罷召義士奇至奉天門諭曰二十年為讒慝所構心之艱危吾三人共之賴皇考仁明得遂保全言已竑然義士奇亦流涕臣士奇對曰今已脫險即夷皆先帝之賜陛下至誠之效更不煩聖明

多慮 上曰即吾去世後誰復如吾三人同心一誠  
遂出二勅三印賜兩人皆拜受退踰月宮車晏駕  
宣宗皇帝甫四歲在北京遠 太宗嗣大位 仁孝  
皇后以至南京初出即學 太宗命設講席於華蓋  
殿之東令太子太師姚廣孝及翰林內閣之臣侍講  
讀永樂七年 駕幸北京 宣宗為皇太孫隨行道  
途所經 太宗親以上過田家遍覽農民具及其衣  
履且諭以農民勤苦之事 太宗親征北虜命上留  
守北京以尚書夏原吉贊輔自是 太宗巡狩北京  
及征胡虜皆從行洪熙元年春南京屢奏地震群臣

或請命親王及重臣往守者 仁宗曰非皇太子不可至南京謁孝陵 仁宗不豫召還夏六月辛丑至北京是月庚戌即位

永樂十四年 上在北京頗聞高煦有異志驛召隆平侯張信訪之 上未信車駕遂還南京以問皇太子對曰人言未可輒信且 父皇在上當未敢有此心一日翰林諸臣奏事退召士奇還問曰汝與蹇義在此漢府事皆當悉知昨日詢義固辭不知不肯言汝當為朕言之又曰如朕未有知汝輩慮有離間之罪朕既知矣汝何慮對曰臣與義同事東宮外人固

無敢與臣等言。雖間有言者，亦百之一二。又多出意度，非見實跡，皆固不敢對。陛下言然，漢王始受冊封國雲南，不肯行，復又改過青州，又堅不行。今知朝廷將徙都北京，惟欲留守南京，此天下之人疑其心，亦豈待事有實哉？惟陛下早善處置，使有定所，用全父子之恩，以貽永世之利。上默然，起還後宮。數日，上得高煦私造兵器及皮船，教習水戰，及僭乘輿服物，挾私擊死無罪官民，縱護衛官軍京城內外劫掠，悉有實跡。大怒，褫其冠帶，繫之西華門內，東宮叩頭懇為救解，乃免。遂命翰林條示其罪，且曰：「若

此所為將來必不靜朕今削兩護衛處之山東樂安  
州

宣德元年高煦反車駕親征罪人既得師還六部遣  
尚書陳山迎駕見上言宜乘勝移師向彰德襲執  
趙王則朝廷永安上召楊榮以山言諭之對曰此  
國之大計遂召蹇義夏元吉諭之兩人不取異議榮  
言請先遣勅趙王詰其與高煦連謀之罪而六師奄  
至可擒也從之榮遂傳上旨令士奇草勅士奇曰  
事須有實天地鬼神豈可欺哉且勅旨以何為辭榮  
厲色曰汝可沮國之大事乎令錦衣衛責所係漢府

士奇全趙

人狀云與趙連謀即事之因何患無辭士奇曰錦衣  
衛責狀何以服人心榮曰汝不言吾言可往與蹇夏  
言之往見二人蹇曰上意已定衆意亦定可中沮  
耶夏曰萬一上從公言令不行趙後或有變如永  
樂中孟指揮之舉誰任其咎士奇曰今事勢與永樂  
中異永樂中趙擁三衛今已去其二且孟指揮所為  
王實不與聞不然趙王豈至今日乎蹇曰即如公言  
今如何處士奇曰今之計朝廷重尊屬厚待之有  
疑則嚴防之亦必無虞而於國體亦正矣二人曰公  
言固當然上信榮言不係吾二人可否也士奇退

與榮曰 太宗皇帝惟三子今 上親叔二人一人  
有罪者不可恕其無罪者當加厚之庶仰慰皇祖在  
天之靈榮曰汝既不草勅我當聞時惟楊溥與士奇  
意合溥曰吾二人請入見上明其大義兵必不可移  
榮聞溥言即趨入見溥士奇亦踵其後而門者止吾  
二人不得入已而有 旨召蹇夏入蹇夏以士奇言  
白 上意不懌然亦不復言移兵遂還京自是道中  
有顧問惟召榮及蹇夏不復召士奇及溥至良鄉臣  
二人始見 上意猶若未平忽厲聲曰好機會不得  
乘到家 皇太后必厄矣 上至京不悔不復及彰



德事然言者猶喋喋請盡削趙護衛且請召趙王拘之京師上皆不聽一日特召士奇諭曰言者論趙王日益多如何對曰今日宗室惟趙王於陛下最親當思保全之毋惑群臣上曰吾亦思之皇考於主最友愛且吾今惟一叔奈何不愛然當思所以保之道吾今將封群言俾都御史劉觀及公侯中選一人齎以示之使自處對曰必不得已則於皇親中擇人與趙心相孚者偕觀行庶幾有所開導上曰然則誰可對曰廣平侯袁容至親且善開諭更得璽書親諭之好上從之因遣容觀行趙王得書及言者所

上表大喜曰吾生矣即猷護衛且上表謝恩而言損  
息上待趙王日益親厚而薄陳山竟疎斥之蓋上  
雖為山所惑而後灼知其非逾數月召士奇至南齋  
宮諭曰吾待趙不失親親之禮爾有力焉自後切毋  
以見迂為嫌

文廟英武群臣奏對少能稱旨惟愛東楊先生之林  
自編修同解縉胡廣等七人入閣議國政未嘗一日  
離左右凡大事密計必與焉或與大臣謀事未決  
文廟不樂甚至發怒東楊一至輒霽威事亦隨決有  
濟人利物之仁而不忍却人之餽人以為愛錢上亦

知之每遂其所欲蓋用人之仁去其貪也或鄉人來  
餽者必訪其貧富如何若知其貧亦不却其餽但以  
別物與所餽相稱酬之若富者以十分為率亦答其  
一二或在法乞救或在卑求薦必留意焉報者相繼  
而不厭也自五府六部都察院無不畏其威聽其說  
使百職不能持正亦由於此大抵居仕途者安能一  
向遂意蓋天有乘除之數默然寓乎其間早年得意  
晚必坎坷少年蹇滯老必通顯或首尾多難而中則  
安樂若東楊自入仕即得君無日不在寵榮之中者  
四十餘年歷事累朝曾無數日之恙生榮死哀始終

重出

全美不可以常數論也或者因其所生而稟得完厚如此其輔理之功在文仁宣時亦尋常在正統數年天下休息頗其力焉至於格君心之非引之當道則樂未有聞也

宣廟時三楊用事思天下或士不由已進退勅方面風憲郡守令在京三品以上官舉保且薄吏部尚書郭進不學無術但以老成至此尋勅令御史知縣許在京五品以上官舉保由是天下要職吏部不得除已而奔競之風大作以賊敗者甚衆有以弊言者遂罷御史知縣舉保之例郡守以上仍舊出於三楊之

門皆由其操去取之權也楊西雖偏而無私尤持公論  
當時天下方面頗亦得人正統六年以後張太后崩  
三楊相繼而亡進退人才之權遂移於中官王振邪  
正倒置矣

朝廷命安遠侯柳升等將七萬人以征交趾命兵部  
尚書李慶泰贊軍務且勅慶凡六卿之屬才且賢者  
舉以自助所舉十數人其最才且賢者禮部儀制郎  
中史安祠祭主事陳鏞師行慶與同卧起九月入交  
趾賊於官軍所經之處悉列柵以守升既連破之直  
抵鎮夷關升有矜色升雖勇然不好謀安鏞言於慶

曰總戎之意驕矣公宜力言之且夷賊譎詐不可以其屢敗忽之安知其不示弱以誘我况璽書數數戒飭謂賊專以設伏取勝不宜輕率待之公宜速入言之時慶已病強起與升言升唯唯而已中實無戒慎意明日前進以數百騎獨先其副裨等隊皆在後升前度橋遽壞後車阻不得前賊伏兵四起升被創死明日慶病不起又明日副將崔聚整兵以進聚固宿將然倉猝賊驅象赴闌衆亂聚被執寇大呼官軍降不殺安鏞皆曰吾輩見危授命耳皆死之十月十八日也先是賊陷諒江等城城中如都指揮李任指揮

顧福知府劉子輔知州何忠等皆死節交趾守師知  
任等死事以聞皆得褒贈從升等死者守師隔遠不  
明知不及聞時與安鑪同行親見其後得脫歸者雖  
言之詳而有司以無官府上狀不可質故安等之節  
不得暴白於朝世之所共惜而痛悼者也一時同死  
者如吏部主事李宗昉等蓋多而安與鑪之事有聞  
者在慶左右也兩人皆進士出身最見相得安字志  
靜豐城人年四十二歲鑪字叔振錢塘人年三十四  
歲

九沙山人萬表曰灼艾別集者於昔灼艾集續集餘

集之外別爲一集也偶有見聞輒復錄梓以與四方  
共之亦性然也

嘉靖癸卯八月中秋日寓清江僧舍識

灼爰別集卷之二終